

सिरि उसहदेव सामिस्स णमो । सिरि गोडी - जिराउला - सव्वोदयपासणाहाणं णमो । नमोऽत्थुणं समणस्स भगवओ महइ महावीर वद्धमाण सामिस्स । सिरि गोयम - सोहम्माइ सव्व गणहराणं णमो । सिरि सुगुरु - देवाणं णमो । **कप्पवडिसियाणं नवमं उवंगं पढमं अज्झयणं-पउमं** १) जइ णं भंते समणेणं भगवया महावीरेणं जाव संपत्तेणं उवंगणं पढमस्स वग्गस्स निरयावलियाणं अयमट्ठे पन्नत्ते दोच्चस्स णं भंते वग्गस्स कप्पवडिसियाणं समणेणं भगवया महावीरेणं जाव संपत्तेणं कइ अज्झयणा पन्नत्ता एवं खलु जंबू समणेणं भगवया महावीरेणं जाव संपत्तेणं कप्पवडिसियाणं दस अज्झयणा पन्नत्ता तं जहा पउमे महापउमे भदे सुभदे पउमभदे पउमसेणे पउमगुम्मे नलिणिगुम्मे आनंदे नंदने जइ णं भंते समणेणं भगवया महावीरेणं जाव संपत्तेणं कप्पवडिसियाणं दस अज्झयणा पन्नत्ता पढमस्स णं भंते अज्झयणस्स कप्पवडिसियाणं समणेणं भगवया महावीरेणं जाव संपत्तेणं के अट्ठे पन्नत्ते एवं खलु जंबू तेणं कालेणं तेणं समएणं चंपा नामं नयरी होत्था पुन्नभदे चेइए कूणिए राया पउमावई देवी तत्थ णं चंपाए नयरीए सेणियस्स रण्णो भज्जा कूणियस्स रण्णो चुल्लमाउया काली नामं देवी होत्था-सूमाला तीसे णं कालीए देवीए पुत्ते काले नामं कुमारे होत्था-सूमाले, तस्स णं कालस्स कुमारस्स पउमावई नामं देवी होत्था-सूमालपाणिपाया जाव विहरइ तए णं सा पउमावई देवी अन्नया कयाइं तंसि तारिसगंसि वासघरंसि अब्भितरओ सचित्तकम्मे जाव सीहं सुमिणे पासित्ताणं पडिबुद्धा एवं जम्मणं जहा महाबलस्स जाव नामधेज्जं-जम्हा णं अम्हं इमे दारए कालस्स कुमारस्स पुत्ते पउमावईए देवीए अत्तए तं होउ णं अम्हं इमस्स दारगस्स नामधेज्जं पउमे-पउमे सेसं जहा महाबलस्सस अट्ठओ दाआ जाव उप्पिं पासायवरगए विहरइ सामी समोसरिए परिसा निग्गया कूणिए निग्गए पउमेवि जहा महबले निग्गए तहेव अम्मापिइआपुच्छणा जाव पव्वइए अणगारे जाएइरियासमिए जाव गुत्तबंभयारी तए णं से पउमे अणगारे समणस्स भगवओ महावीरस्स तहारुवाणं थेराणं अंतिए सामाइयमाइयाइं एक्कारस अंगाइं अहिज्जइ अजिजित्ता बहुहिं चउत्तथछट्ठमं - (दसम-दुवालसेहिं मासद्धमासखमणेहिं विचित्तेहिं तवोक्कमेहिं अप्पाणं भावेमाणे) विहरइ तए णं से पउमे अणगारे तेणं ओरालेणं जहा मेहो तहेव धम्मजागरिया चिंता एवं जहेव मेहो तहेव समणं भगवं महावीरं आपुच्छित्ताविउले जाव पाओवगए कालं अणवकंखमाणे विहरइ तए णं से पउमे अणगारे समणस्स भगवओ महावीरस्स तहारुवाणं थेराणं अंतिए सामाइयमाइयाइं एक्कारस अंगाइं अहिजित्ता बहुपडिपुन्नाइं पंच वासाइं सामण्णपरियागं पाउणित्ता मासियाए संलेहणाए अप्पाणं झोसेत्ता सट्ठिं भत्ताइं अणसणाए छेदित्ता आणुपुव्वीए कालगए थेरा ओइण्णा भगवं गोयमे पुच्छइ सामी कहेइ जाव सट्ठिं भत्ताइं अणसणाए छेदित्ता आलोइय-पडिक्कंते उड्ढं चंदिम-सूर-गहगण-नक्खत्त-तारा-रुवाणं सोहम्मे कप्पे देवत्ताए उववण्णे दो सागराइं ठिई, से णं भंते पउमे देवे ताओ देवलोगाओ आउक्खएणं पुच्छा गोयमा महाविदेहे वासे जहा दढपइण्णो जाव अंतं काहिइ तं एवं खलु जंबू समणेणं भगवया महावीरेणं जाव संपत्तेणं कप्पवडिसियाणं पढमस्स अज्झयणसस अयमट्ठे पन्नत्ते त्ति बेमि । १। **☆☆☆ (२१) पढमं अज्झयणं समत्तं बीअं अज्झयणं - महापउमं** २) जइ णं भंते समणेणं भगवया महावीरेणं जाव संपत्तेणं कप्पवडिसियाणं पढमस्स अज्झयणस्स अयमट्ठे पन्नत्ते दोच्चस्स णं भंते अज्झयणस्स कप्पवडिसियाणं समणेणं भगवया महावीरेणं जाव संपत्तेणं के अट्ठे पन्नत्ते एवं खलु जंबू तेणं कालेणं तेणं समएणं चंपा नयरी होत्था पुन्नभदे चेइए कूणिए राया पउमावई देवी तत्थ णं चंपाए नयरीए सेणियस्स रण्णो भज्जा कूणियस्स रण्णो चुल्लमाउया सुकाली नामं देवी होत्था तीसे णं सुकालीए पुत्ते सुकाले नामं कुमारे तस्स णं सुकालस्स कुमारस्स महापउमा नामं देवी होत्था-सूमाला तए णं सा महापउमा देवी अन्नया कयाइं तंसि तारिसगंसि एवं तहेव महापउमे नामं दारए जाव सिज्झहिइ नवरं-ईसाणे कप्पे उववाओ उक्कोसट्ठिइओ तं एवं खलु जंबू समणेणं भगवया महावीरेणं जाव संपत्तेणं कप्पवडिसियाणं दोच्चस्स अज्झयणस्स अयमट्ठे पन्नत्ते त्ति बेमि । २-१। (२२-१) **☆☆☆ बीअं अज्झयणं समत्तं ३-१०-अज्झयणाणि** ३) एवं सेसावि अट्ठ नेयव्वा, मायाओ सरिसनामाओ कालाईणं दसण्हं पुत्ताणं आनुपुव्वीए । २-२। (२२-२) ४) दोण्हं च पंच चत्तारि तिण्हं तिण्हं च होति तिण्णेव दोण्हं च दोण्णि वासा सेणियनत्तुमं परियाओ ॥१॥ ५) उववाओ आनुपुव्वीए-पढमो सोहम्मे बिइओ ईसाणे तइओ सणंकुमारे चउत्थो माहिदे पंचमो बंभलोए छट्ठो लंतए सत्तमो महासुक्के अट्ठमो सहस्सारे नवमो पाणए दसमो अच्चुए सव्वत्थ उक्कोसट्ठिइ भाणियव्वा महाविदेहे सिज्झिहिंति । २।-(२२) **कप्पवडिसियाणं ३-१० अज्झयणाणि समत्तानि २० कप्पवडिसियाणं समत्तं नवमं उवंगं समत्तं** **कप्पवडिसियाणं**